

# **ZAKOBO' GIZINE' LUHUVO NITE'**

## **Zakobo' Gizine' luhuvo Nite' Gomu' Gataa' Gamazi**

Mono' Godolo Gosohoku' nene evene' setihami gulive'ine hamo' gulive'ine minine' minani' nene Zakobo' ve lisa minani' nemu' gataa' noune. Ma nene Zebedaio' gipele minine' nene Zohane' uvoloho ve. Ido' a'mine nene Izusu' izipahala zuho tuveluti' minine' ve. Aza nene evene' naba Helode' ne'mo luvono gitilo lavo a'mine Zakobo'ni nene luvono gitani'. A'minemu' nene Aposolo Gono Di Minani' Monovo gizani' nene laka'ni 12 ido' goholo 1 neloti' 3 neu' gatelesane. Ido' Zakobo' ma nene Alahaio' gipele minine'. Azasi nene Izusu' izipahala zuhouti' minine'. Ido' Zakobo' ma nene Izusu' akunolo minine'. Zakobo' luhuvo nite' nene Izusu' akunolo ne'mo gizine' ve li Izusu' zuho muki' nete gili ele'vole' ani'. Izusu' gamazi've lamine' Zohane' gizingu' nene ti' lo line': Izusu' akunolo zuho nene Izusu'nimu' gili ele'vole' igi e'metamavo mino helo otavosa gili ele'vole' igi e'metani'. Ti' aha Paulo' Kolidi ebeku' Izusu' zuho minani' luhuvo nite' hulo-ngidingu' nene Izusu' hilinguti' otosa nakunolo Zakobo'ni soto' o emo ido' izipahala zuhos nene soto' o ngimive line'. Soto' o imine' gameneu' nene Zakobo' aza Izusu'nimu' gele ele'vole' ogo e'metive li evene' muki' nete gilani'. Ne'mine ogo alinge' nene Izusu' zuho Zelusalemi ebeku' minaveti gizebo ve'ine lolo'

ogo minine!. Minavo mono' gizebo ve muki'  
 Zelusalemi ebeku' mulise mili Zuda ve minama-  
 dite Izesu' zuho lili' ani' nene oko'ine lolovo huki  
 Zuda veti lou' gamazi muki' e'metilizani' o neive  
 lo lo-ngemelobe lo-ngemamolone li gamazi'ine di  
 hamo' ilisa mulise milangu' nene Zakobo' aza  
 gamazi lo osu' lolosa gamazi'ine do hamo' ogo  
 ne'mine lo lo-ngemamolone lo line'.

Ne'mine line'za asi've Zakobo' nene Zuda ve  
 mino Zuda veti lou' gamazi nene e'mete lamine'  
 ine!. Ido' Zakobo' a'mingu' neivo inite' mata'  
 Zelusalemi numungu' soto' ine' nemu' luhuvo  
 gizave mate ti' li lani': Evene' muki' Izesu' zuho  
 minanikisi minamanikisi nene Zakobo'nimu'  
 gilavo dizavo ve lisihe' gehepeve ve li li-dani'.  
 Evene' ma nete Zakobo'ni bilani' monovo nesi  
 gizani'. Ma nete ti' li gizani': Evene' muki' nene  
 Izesu' zuho lili' i di vi minangumu' nene Zuda  
 veti eveneto' medelo mino O'moso inite' lehize-  
 daa' ive nabasi ido' eze zuhos ngizebolo' molavo  
 Zakobo'ni asi li di eveneto' i-diki Izesu'nimu'  
 aza O'moso'mo do lu' izelive lo imiselelesa live  
 nene nomive lo evene' lo-ngemelive li amuzo  
 mili li-imani'. Li-imani'za Zakobo' aza ne'mine  
 losa'mine' nenako o've lo geke' lo asi lo evene'  
 ti' lo lo-ngimine': Izesu' nene O'moso'mi gipele  
 evene' muki' ize' molo-ledaa' neive ve. Ti' lo  
 line' nene Zuda ve Izesu' zuho minamani' nene  
 ngizebolo' goloso molavo geheni huli bili nizavo  
 hilin!. Zakobo' velesi ha minine' gameneu' nene  
 Loma veti guve'inesi ve naba ne'mo gizebo o  
 minine' misubou' Zuda ve nene ebe' ato ato'  
 mukiku' mini'mi moni minani!. Ma nene go-  
 zopo' lovo vete avo'ningine Zudaia misubouti'  
 di vikevo a'mine di vani' misubola minani!. Ma

nene Zudaia misubo huli geheni gono'ine dalisa misubo ato atota vani'. A'minguti' linge ma nene Izesu' zuho lili' ani'. Gamene ma Zakobo' olihe helamo velesi ha mino Zelusalemi ebeku' Izesu' zuholiti gizebo ve'ine mino nene a'mine Zuda ve ebe' ebeku' hutile' igi ato ato' misubou' vi minada nene luhuvo nite' gizo hulo-ngidine!. Luhuvo gize-ngidingu' nene O'moso'mi evenele zuho nene igi mili monilizani' monovomu' gizine!. Ei' Zakobo' luhuvo nite' gizingu' nene inite' mukikumu' line!. Evene' nete Izesu'nimu' gili ele'vole' angumu' ve li ngibili ngele'mize goloso navo ma nadi' ilizahe nemukisi lo gizine!. Ido' O'mosola laakumukisi ne lo gizine!. Ido' goho' gahalikumukisi heneni vemukisi nevo ma lo gizine!. Ido' O'mosola gele ele'vole' ogakumukisi nevo lo gizine!. Nemu' gizingu' nene O'moso'mi gamazi nene gato gatedunukovo' gelo mo lamine' ve lo gelosa a'minevo' olone' nene O'mosomu' olihe gele ele'vole' amune lo gizine!. Ido' O'moso'mi gamazili'mo lidi'mine lidi'mine amolone' nene O'mosola gele ele'vole' o guno amune line!. Ido' goho' gahali' sihele'ni gopo monani' ido' negi nene nasahili' o-ngedaakumukisi lo gizine!. Mevo gamazi goloso lamine' lo molo laa' une' nevomukisi lo gizine!. Ido' alinge' ne'mine mana'mine olone laa' noune' nene O'moso'mo gala gelo leli' dalizave lo lo-lidine' nemu' nene gelamo laa' noningumu' nesi lo gizine!. Ido' evene' oko'ningu' olo' lavo lovo hizi ido' di goloso iga' ani' nemukisi gizine!. Ido' evene' di gopo igi aka golosou' vani' nene do ti'no ngele'mize aka lamineta ogakumu' nesi lo gizine!. Inite' muki'

memu' nene lo gizosa hulo-ngidine!.

Luhuvo nite' Zakobo' gizine' ma nene gatosa ne gele guno olosane.

### *Zakobo' Geke' lo-ngedo Luhuvo Gize-ngidine'*

<sup>1</sup> O'moso ido' Guvetesi ve Izesu' Kilisito' engi' gelekele' izipe Zakobo' naza luhuvo nite' no-gizuve. Isilaele' veti avoteho Zakobo' gipele zuho tuvelu engi' nga'vopilemo' mulise'ninguti' mulise'ninguti' ma hutile' igi misubou' misubou' mini'mi vangutii' Izesu' evenele zuho lili' ave lengikumu' luhuvo nite' mene nogizuve. Longopo'ni lo nogizuve.

### *Lemengu' Soto' O-ledaa' Neine' Ne'mo Gele Ele'vole' Ogate Do Amuzo Molo-ledaa' Neingumu' Gazine' Gamazi*

<sup>2-3</sup> Neze zuho mate, lengemengu' molaa' inite' nehe mulumo nite' ato ato' nehe ne'mine inite' lengita soto' iline' ne'mo nene O'mosomu' gili ele'vole' iga' nani' nene do amuzo molo gili ele'vole' igi di gili' li minilizani' monovo do soto' iline' nene mo gili nizave. Gili nizanako mulumo nite' ato ato' ne'mine lengita soto' neivo ma muludingu' goloso gilami longolize izivo' minilo.

<sup>4</sup> Mulumo initeku' mini O'mosomu' gili ele'vole' igi di gili' li minani' nene hulami a'mingukovo' minilizani' ne'mi gihile nene ne'mino soto' oloseive: Lengita mono' monovo lamine' mine osu' lavo nominekisi minami minilisave. Nemu' nene ne'mine ogo minelone li gili ele'vole' igi di gili' li minilo.

*Gate Lamine' Gelaal' Monovomu' Vise' O  
Ma A'minemu' O'mosola Loloningumu' Gizine'  
Gamazi*

<sup>5</sup> Ido' lengikuti' ve mali'mo gala lamine' gelaa' monovomu' nene vise' ogo ma O'mosola lilive. Liline' ha emeleseive. O'moso neve evene' muki' nene balu o-ledo lukehe amo inite' ha lemaa' neive. <sup>6</sup> Nemu' nene a'mine ve O'mosola lilingu' inite' dalohe damolohe lo gala seta' gelamo gele hamo' o mino O'mosola lilive. Ga'ine sita' gilaa' nave nene ga'ine gili nge lami guvo noso mine guno amivo hepeli'mo do mone mone oga' neine' ne'mini minaa' nave. <sup>7-8</sup> Ve a'ne'mine ve lu'ine ga'ine taza vo vine' nete zovo' izi di monaa' nanako Guvelesi velati' inite' ngeli damilisave.

*Goho' Gahali' Vemu' Ido' Heneni Vemu' Gizine'  
Gamazi*

<sup>9</sup> Neze zuhokizo, linginela evene' ma limi nizave ingine nene O'moso'mo ningivo dizi nizanako nemu' ngolize izi minilizave. <sup>10</sup> Ido' heneni ve nete heneni'inemu' ngolize izami ingine O'moso'mo ningivo limi nizani' nemu' ngolize izi minilizave. Guvise navise'mi guvovo suludani' ne'mine igi suludilisave. <sup>11</sup> Ee, ho' dizo amuzo molo lavo a'mine guvise navise goko' loloseive. Ido' goko' lavo guvovo suludo'mozavo emeni've gonolise've lamine' nene goloso oga' neive. A'mine'mine igi heneni ve ingine gono beze'ningu' moni minilizadot'i vi tolovo ilisave.

*Lemengu' Molaakumukisi Ido' Lihime Daaku-  
mukisi Gizine' gamazi*

<sup>12</sup> nGemengu' molaa' initeku' nehe mulumo initeku' nehe mulumo inite' ato atoku' nehe

ne gilizevo ami amuzo mili minilizave ingine ngolize izi minilisave. Amuzo mili mini a'mine inite' ivile' ikevo ne'mi meni've nene O'moso'mo minevo' minevo' ngemeni dameni nene lehize-ngegedelesive. Ee, lu'ine O'moso imi nizave engi' ngemelove lo salani molo-ngidine' inite' minevo' minevo' ngemeni dameni nene lehize-ngegedelesive. Ido' lehize-ngededelingumu' ve li ngolize izi minilisave. <sup>13</sup> Inite' mali'mo emengu' molalosa lulo hizo eze gelelehe' ogo do vavo ma a'mine ve aza lihime dosa O'moso'mo nemengu' molave lamilive. Lihime daakumu' nene O'moso aza lulo otesa'mive. Ido' lihime dalizave lo O'moso'mo nene lemengu' molosa'mive. Nemu' nene nemengu' molave lamilive. <sup>14</sup> Leli' goloso nite' ogo molo ogakumu' lumo helaa' neine' ne'mo gate hizo limimise' oga' neive. <sup>15</sup> Lumo helaa' neine' ne'mo izipahala mino gedeline' ne'mi gulive nene lihime ve. Lihime ne'mo naba ogo izipahala mino gedeline' ne'mi gulive nene helaa' ve.

<sup>16</sup> Neze zuho lu'ne lengeme nouvoni' mate, ladani gatine gilamilo. <sup>17</sup> Inite' mata' lamine' ido' lele'mize lamine' oga' inite' lamine' nene O'mosolati' neive. Meteho O'moso Okulumoku' labana' elaa' neine' inite' do soto' molave aza a'mine molani' inite' nene ne'mino do velepe' alepe' izesa'mive. Gamene gamene do lamine' o-ledovo' neive. <sup>18</sup> Laza nene ei' do soto' ine' inite' muki' ngivile' igi mini evenele zuho gosoho' gana' api' igi lili' ilizave lo O'moso'mo asi've gala gelo gamazi've gihiledunu' do soto' o-ledo lemeni dameni gosoho' lemave.

*O'moso'mi Gamazi Gelo Gele Do E'metaakumu'  
Gizine' Gamazi*

<sup>19</sup> Neze zuho lu'ne lengeme nouvon'i mate, gamazi mene gilio. Lingine muki' nene gamazi gelaakumu' lite' li di nene igi minilo. Ne neiha gamazi laakumu' nene zou li gili minisa lilo. Ido' linginela lite' lo lingizebolo' molamivo. <sup>20</sup> Evene' lizebolo' ne'mo O'moso'mi monovo lisihe' nene ngelo do soto' amoloseive. <sup>21</sup> Nemu' nene lutine do goloso oga' init'e muki' ido' goloso nite' pata' buu lo minine' nene huli hokolize' ami okodine di'mi limi mini O'moso'mi gamazi lutingu' molani' nene di gili' li dalo. O'moso'mi gamazi ne'mo nene do lungu' izo do lamine' oloseize. Di gili' li dalo.

<sup>22</sup> Ido' ne'mine igi O'moso'mi gamazi nene haz a gatinedunukovo' gili minami gili di e'metilo. Haza gatinedunukovo' gililizani' nene langisteine lutine golo izilisave. <sup>23</sup> Evene' malite O'moso'mi gamazi gili gili damilizani' nene ve ma gapogapoku' ningi engi' go'ine ve'ine ningaa' nani' ne'mino neive. <sup>24</sup> Go'ine ve'ine ningi vikevo a'mido' lite' lo ga'ine molaa' neive. <sup>25</sup> Nene neiha O'moso'mi gamazi lo huko-lidine' nene gamazi gihile lamine' mino goloso niteli'mi gelekele' ve minuninguti' apase-ledaa' neive. Ne'mine oga' neine' nenako a'mine gamazi neuti' nene O'moso'mi monovomu' vise' ogo gate molamivo gele dovo' minelone' nene O'moso'mo a'mingu' hize ele' o-ledavo init'e muki' olone' nene lamine' ogavo muludeu' lamine' gelelesune.

<sup>26</sup> Evene' malite O'mosomu' gele ele'vole' ogo mono' ve none li lilizani' nete gamazi laa'

ado' gizebo isa'mani' nene evene' a'ne'mine  
ve mono' ve nobe li engi' lu'ine golo izi soza  
lilisave. <sup>27</sup> Lodomulo' izipe ido' vene' geto'  
muhele' igi minani' nene ngele'mize lamine'  
olone' ido' me misubou' evene' O'mosomu' gil-  
amaveti monovo'ine dokunivo lute do goloso  
ogalive lo gizebo ogo minelone' nene O'mosomu'  
gele ele'vole' ogo mono' ve gihile minelonidi'mo  
Meteho O'moso'mi velelo' hehe lamine' lo mine-  
leseive.

## 2

### *Evene' Do Kegeso Ninge Lamine' Ogo Ninge Goloso Amaakumu' Gizine' Gamazi*

<sup>1</sup> Neze zuho mate, lingine labana'vesi minive  
Guvetesи ve Izesu' Kilisito'nimu' gili ele'vole'  
i nizanako evene' di kegesi evene' mamu'  
siza li-ngidi evene' mamu' ningi hulaa' nani'  
nene nanitekumu' ve. <sup>2</sup> Lingine mono' gililisa  
di gese' igi nizavo ve mali'mo inite' lamine'  
ngolo analo' ngolidunu' lili' ani' lini lamine'  
izo nodizivo ve goho' gahali' ma genegana've  
litehevo' izo dizeline' nesi nene <sup>3</sup> lingine inite'  
amine' ngolo nodizive ma ne ningi siza li-di  
gaza holomo lamineta me ogo minezo li-di ve  
goho' gahali' nene gaza aka' volela vo ote minezo  
ido' mehe'neko ogo minezo li li-imilizani' nene  
<sup>4</sup> lingine evene' di kegesi-ngidi gatine goloso gili  
evene' gizeka' iga' nave.

<sup>5</sup> Neze zuho lu'ne lengeme nouvoni' mate,  
gililo. Evene' me misubou' minanguti' linge  
mamu' ve gohi' gahali' nizave li laa' nahe.

A'mine ve nene O'moso'mo neze zuho lili' il-isave lo do kegese-ngidine' ma ve. Ee, ezemu' gili ele'vole' ikevo nemu' O'moso'mo gelavo gili ele'vole' ani' ne'mo heneni'ine lolol' ogavo heneni ve gililisave. Ido' lu'ine imilizavemu' O'moso'mo inite' ma ngemelesa salani molo-ngidine' neive. A'mine inite' nene a'mine goho' gahali' engi' ngemelove lo do kegese-ngidine' ma ve. Ido' ngemeline' inite' nene ne'mino neive: Ingine O'moso'mo gizebo o neingu' vi hilalisave.

<sup>6</sup> Ne neiha lingine neve ningikevo goho' gahali' nene hazza nite' minani' ve. Heneni ve neve ingine goboni mili-lingidi gonito' lengele'mizi di moni' moni' i-lingidaa' nave. <sup>7</sup> Ido' Izesu' gulive lamine' lingine di nizani' nene inginesi di hozi laa' ilizanako a'mine heneni ve nete divi' ledivi' iga' nave.

<sup>8</sup> Mono' godolou' Guvetesи ve naba'mo lo huko line' gamazi ma ne'mino neive:

Geikumu' gelaa' naine' ne'mino gei' nanida niza-vemu' gelo luka ngemezo lo lo neive.

Lingine a'mine ele'vole' gamazi gili dalizani' nene inite' gihile dalisani'za <sup>9</sup> evene' ma siza li-ningidi evene' ma ningi gosele' ilizani' nene lihime dalizani' o neive. Ido' ne'mine ilizani' nene O'moso'mo lo huko line' gamazi avuto' iga' ave minikeve loloseive. <sup>10</sup> Ve mali'mo O'moso'mo lo huko line' gamazi muki' gele do mino hamokovo' ma gele huliline' nene muki' avuto' ine' gele-leseive. <sup>11</sup> O'moso'mo vene' longo' amilo ido' evene' ngibili hilamilo nesi line' ma neive. Nemu' nene gaza vene' longo' amaba evene' ma bele heleline' ne'mo mo lou' gamazi avuto' ogal'

anive lolo' olosane. <sup>12</sup> Ido' O'moso'mo evene' muki' ize' molo-ledelesa nene lihime monovolo' gelekele' ogo minuninguti' apase-ledaa' ine' lou' gamazi've nene gili di minahe gili hulahe lo ize' molo-ledeleseive. Ne'mine ilingumu' nene gilii lingine gamazi lilizadokisi inite' igi mili ilizadokisi gizebo igi minilo. <sup>13</sup> Ido' ve mali'mo evene' ise'ine izesa'mivo ma O'moso'mo goni' o-do eze iseve ize-damoloseive. Ido' evene' ma nete evene' ise'ine izaal' nave nene a'mine'mine ogo O'moso'mo engi' ise'ine ize-ngedeleseive. Ise'ine izaal' ne'mo goni' oga' nene ivile' oloseive.

*O'mosola Gele Ele'vole' Oga' Monovomu'  
Gizine' Gamazi*

<sup>14</sup> Neze zuho mate, ve mali'mo monovo lamine' ogo molo minamo naza Izusu'nimu' giluvoni' nene gele ele'vole' okuve lo liline' nene haza nite' lolo' oloseive. Ne'mine ogovo' gele ele'vole' o do vildoti' nene O'moso'mo do u' izamoloseive. <sup>15</sup> Ve ma he vene' ma he oko'nolo' inite' nomivo noso' nitekisi vise' ogo neivo <sup>16</sup> lengikuti' mali'mo a'mine vise' ine' inite' ma emamo geita hongu minivo vozo. Mu'mu lo-gidivo mino no gatunga ogo minezo lo lo-emeline' nene lamine' ilihe. A'mine haza gamazi line' ne'mo evene' ha do lamine' o-delihe. Haza ngelo do lamine' o-damoloseive. <sup>17</sup> Ido' a'mine'mine ogo a'mine gamazi line' nene haza nitekovo' minine' ne'mino monovo lamine' ogo molo minamo haza O'mosomu' gele ele'vole' oga' nesi haza nite' neive. Evene' ma ingine gili ele'vole' igisa monovo lamine' nesi igi mili minamilizani' nene

O'mosomu' gili ele'vole' ani' nene hele osu' lo haza nite' lolo' ogave.

<sup>18</sup> Ne neiha lengikuti' ve mali'mo ti' lo lilihe lo gele nouve: Evene' malite O'mosomu' gili ele'vole' iga' navo ido' evene' ma nete monovo lamine' igi mili minaa' nave. Ido' ve ma ne'mine lo lilin'e naza ti' lo lo-emelesuve: Monovo lamine' ogo molo amosa O'mosomu' gele ele'vole' o naine' nene nado do soto' anivo ningelove. Ne neiha naza monovo lamine' ogo molo nouvon'i ne'mo O'mosomu' gele ele'vole' o nouvonikisi nene do soto' ogavo neloti' ha ningelesane lo lo-emelesuve. <sup>19</sup> Lingine O'moso hamokovo' neive li gili ele'vole' iga' nahe. Ne'mini gilaa' nani' nene mo lamine' neiha Satani'mi zuho sikalahu' goloso ingine nesi a'mine'mine igi O'moso neive li gilii gili ele'vole' iga' nave. Ee, ingine gili ele'vole' iga' nanako nemu' nene lihime lemeleseive li golise gilivo' minaa' nave. <sup>20</sup> Monovo lamine' ogo molo minamo O'mosomu' gele ele'volekovo' oga' olone' nene haza nite' neine' nenako gaza gelamabe. Ve negi mene naza gelebizelove. <sup>21</sup> Avoteho Abalahamu' aza gipele Isaka'ni O'moso gize emelesa ogo monovo lamine' ine' nemu' O'moso'mi velelo' ve lisihe' gehepeve lihime'vesi nomine' minine' giline' nene lingine mo gili nizave. Olo. <sup>22</sup> Nemu' nene aza O'mosomu' gele ele'vole' ogo mino monovo lamine' nesi ogo molaa' idot'i nene monovo lamine' oga' monovo've ne'mo O'mosomu' gele ele'vole' oga' monovo've nene hize ele' ogo do gihile izo do soto' ine' nene ningi gilamahe. <sup>23</sup> Ne'mine ogavo mono' godolou' minine' gamazi ma nene gihile izine' ve. A'mine

gamazi nene ne'mino neive:  
 Abalahamu' aza O'mosomu' gele ele'vole' ine'  
     nemu' O'moso'mo gelo  
 Abalahamu' nene lihime've nomive ve lisihe' ve  
     line'  
 Ido' evene' ingine ezemu' O'moso'mi zogo ve  
 neive li lani!. <sup>24</sup> Nemu' nene O'moso'mo ningivo  
 lihimete nomivo ve lisihe' minaa' noune'  
 ne'mi monovo mo ningi osu' li nilisave. Ne'mi  
 monovo ne'mino neive: Evene' haza gili ele'vole'  
 iga' nanikovo' nene O'moso'mo ningivo lisihe'  
 osa'mive. Ido' evene' ezemu' gili ele'vole' igi  
 monovo lamine' nesi igi mili iga' nani' nene  
 ningivo evene' lisihe' lihime'ine nomine' minaa'  
 nave. <sup>25</sup> Ido' a'mine'mine ogo pasidia' vene'  
 Lahaba' aza monovo lamine' ogavo O'moso'mo  
 ezemu' gilivo lisihe' ine' ve. Isilaele' aleve  
 Kanaha misubo dizi dalisa nizavo guve'inesi ve  
 Zosuva' aza evene' ma misubo amamaka' mili  
 ningilizave lo ngimiselavo vi a'mine Kanaha  
 vene' Lahaba' neida vikevo aza ngele'mize  
 numu'veu' molo Kanaha evene' nete ningi ngibi-  
 likelizave lo aka atota ngimiselavo vani!. <sup>26</sup> Ve ma  
 sikalahu've nomivo oko'no losuvovo' mineline'  
 nene mo hele neive lolosune. A'mine'mine ogo  
 ve ma aza haza gele ele'vole' ogo mineline'za  
 monovo lamine' ogo molo minamivo ma eze gele  
 ele'vole' oga' neine've nene ezela mo helave lo  
 lolosune.

## 3

*Vete Nahuno Ne'mo Gamazi Goloso Lalize Lo  
 Gizebo Lamine' O-delone Lo Gazine' Gamazi*

<sup>1</sup> Neze zuho mate, laza tisa' lolo' ogo nonivete ladanga gamazi lolone' nene O'moso'mo a'minemu' goni' o-ledo haz a evene' goni' ongedeline' nene ivile' ivosa leli' nene goni' nabalo' o-ledeline' nene gili nizave. Gili nizanako nemu' nene lengikuti' evene' muki' tisa' lili' amilo. <sup>2</sup> Evene' muki' laza ladani vai' oga' noune. Evene' hamo' hamolite gamazi ladanga lamilizani' nene ingine ve lisihe' gehepeve minilisave. Ve'nido' gizebo lamine' igi gopo gamazi lisa'manako oko'nine mukito' ha gizebo lamine' ilizado' i nizave. <sup>3</sup> Hosi ize ingine inite' naba nizani'za oko'ine di zovo' izi vilizangumu' ve li sitia' inite' ainidunu' lili' ani' ngomo lasolo nene ve'ningu' di ingihi-ngidikevo ne'mo gamazi gilaa' nave. <sup>4</sup> A'mine'mine ogo sipi nene inite' naba' naba neivo ido' hepe' naba ne'mo do vaa' neine'za sipilo' daa' ive aza sipi'mi sitia've ngomo' gelelehe' ogavo inite' nabali'mo a'mido' gele do zovo' izo vaa' neive. <sup>5</sup> A'mine'mine ogo vete nahuno nene inite' ngomo lasolo neine'za a'minetunu' gamazi lokunivo ne'mo inite' naba ma soto' oloseive. Olo' vele ngomo ne'mo gulumo ogo za zuho inite' mata' muki' lovotaa' neive. <sup>6</sup> Ido' vete nahuno nene olo' ne'mino neive. Okodela inite' vaikuti' vete nahuno nene misuboko monovo goloso mukiliti ize'nibo nene neive. Vete nahuno ne'mo okode lute do gopo' napa' oga' neive. Olo' vele nene gulumo ogo za zuho inite' mata' muki' lovotaa' neine' ne'mine ogo misubou' evene' mukiliti vete nahuno nene olo' ebekuti' ve Satani ne'mo do velepe' alepe' ize-ledavo gamazi goloso losa a'midot'i' ogo molo

oga' noune' initel nene golosovo' o do vaa' neive.  
 7 Ize gulo gaha nama, gosihe', nosou' nama gaha ato atoli'mine muki' nene ha di ga'ine lilizado' o neive. Ido' di ga'ine laa' nani'za 8 vete nahuno nene ve mali'mo ngelo do gala lamoloseive. Vete nahuno nene initel goloso do velepe' alepe' izo mino hazasi minesamive. Vete nahuno nene zahemed goloso helaa' initel ne'mine neive. 9 Vete nahunodunu' Guvetesi ve Metehine opo'ni laa' noune. Ido' O'moso eze gidini do soto' ine' evene' nene a'mine vete nahunodunu' gamazi goloso lo-ngedaa' noune. 10 Vete hamokuti' opo'ni laa' noune. Ido' do velepe' izo gamazi goloso nesi laa' noune. Neze zuhokizo, nene edamine' suno neive. 11 Noso hinipini' hamokuti' lingela nene naa' limivo ido' lingela nene ekese' limivo ilihe. 12 Za ato' za dize nolingu' za mali'mi gihile've ngelo izamoloseive. Vaini nala' malo' gohuno gihile ngelo izelihe. Ido' guvo nosoti' naa' noso ohizelibe. nGelo ma ohizamolosane. Nemu' nene veka hamokuti' gamazi laminekovo' lemelize.

### *Gele Vevesaa' Nene O'mosolati' Ani' Ve Lo Gizine' Gamazi*

13 Lengikuti' ve ma gamazi monovo gelaa' ive mino gala gele veveso oga' ive noline' nene hokolize' amo gele vevesaa' monovo ne'mo do soto' oga' neine' monovo ado' okode do'mo lemo minaa' monovo ogo molo minelidot'i nene a'mine gamazi monovo gelo gele vevesaa' monovo've nene do soto' ilido' o neive. 14 Ne neiha lingine lutingu' lukehe ekese' ngibili mini ge hulo ne hulo li mini okodine di dizi laza gate gele veveso oga' nonive ne none li lilizani'

nene mo gamazi lamine' lami sozasi lilisanako nemu' ne'mine lamilo. <sup>15</sup> Ne'mine ilizani' nene O'mosolati' neine' gele vevesali'mi monovo nene dalisave. O'mosomu' gili hulaa' ave me misubou' ve ingine iga' nani' ne'mine Satanilati' neine' monovo nene dalisave. <sup>16</sup> Lu'ningu' lukehe neivo ge hulo ne hulo li minilizada evene' lu'ine bizamivo gopo' napa' mini monovo goloso ato atoli'mine muki' di minilisave. <sup>17</sup> O'mosolati' gele vevesaa' monovo di minave engi' monovo'ine nene ne'mino neive: Inite' naba nene lu'ningu' goloso initekisi nomivo lu'ine laminekovo' minaa' neive. Ido' a'midoti' nene ve hongu vovo' mini gelekele' igi evene' muhele'ine ningi di lamine' tamine' i-ngidi ido' evenekumu' gili mamu' ngumo hilivo mamu' gosele' ngibilivo ami di kegesi-ngidami mini ve'ine avileloti' soza lamilisave. <sup>18</sup> Ido' hongu ve evene' kuku hili-ngidi hongu li minaa' nani' ne'mi gihile nene lisihе' lamine' minaa' nene soto' ogavo dalisave.

## 4

### *Me Misubou' Minaveti Monovomu' Lumo Helalive Lo Gizine' Gamazi*

<sup>1</sup> Ido' gamazi gohi ma lo-lengemeloze: Linginela lingizebolo' molavo lovo hizi minaa' nani' nene naniteli'mo ve. Lingine lanite' gili ahu' lani' inite' nete lutingu' lovo di soto' ikevo ne'mo lovo hizaa' nave. <sup>2</sup> Inite' mamu' lungumo hiline' nene dami evene' ngibililisa gilaa' nave. Ido' a'mine initekumu' mumuzo' igi ngeli ma damilizani' ogavo ma gililinga li lovo hizaa' nave. Inite' ma damani' nene

O'mosola voku' lisa'madi'mo nene disa'mave.  
<sup>3</sup> Ido' initel' mamu' O'mosola voku' lani'za gatine goloso gili langisetine a'mine initeli'mi lanite' gililizangumukovo' voku' likevosa nene O'moso'mo lengemesa'mive. <sup>4</sup> Lingine nene vene' ma va'ningine huli ve gohi malo' vaa' ave ne'mine mini O'mosomu' lungumo hilin'e nene huli me misubou' ve O'mosomu' gili hulani' alevemukisi ido' engi' initel'inemukisi lungumo heleline' ne'mo O'moso mehedine imaa' ido' lovo i imaa' o neine' ne gilamahe. <sup>5</sup> Ido' mono' godolou' gamazi ma ne'mino neive:

O'moso'mo leze luteu' molani' sikalahute ne'mo initel' ato' atokumu' umo helavo  
 a'mine nene dalongisi lo ahu' laa' neive.

A'mine gamazi nene hazamu' neive li gilahe. O'ove. Hazamu' nomive. <sup>6</sup> Ne neiha lumo helaa' initel' goloso nene gele emamoloningumu' ve lo O'moso'mo vauve elo hize ele' o-ledaa' neive. Nemu' nene mono' godolou' gamazi ma ti' lo neive:

O'moso'mo hokolize' iga' ave lovo o ngemo limi minave hize ele' o-ngedaa' neive.

<sup>7</sup> Nemu' nene O'moso gelekele' i-di Satani nene o've li-di gili huli-dilo. Ne'mine ikevo hulolengedo golise vohaha oloseive. <sup>8</sup> Lingine O'mosola vi gi'mizilizani' nene aza linginela a'mine'mine ogo gi'mizeleseive. Lingine goloso initel' daa' nave a'mine initel' alo' hulilo. Ido' O'mosola volohe goloso initeta volohe li ve'nehe' ka'nehe' nilani' nene huli lutine noso izi di lamine' ilo. <sup>9</sup> Lingine monovotida gili evene' goloso none li agae agae li longovozo hili mulumo gili ive ilo. Ee, gize zohi' igi longolize izaa' nani'

nene huli mulumo gili muhele' igi ivevo' igi agae agae li minilo. <sup>10</sup> Ne'mine igi Guvelesi ve'mi velelo' langisetine lutine di'mi limilo. Ne'mine ikevo Guvelesi ve aza do'mo dize-lengedeleseive.

*Evene' Ge Dovo Ledeveno' O-nede Ne Dovo Ledeveno' O-gede Lamaakumu' Gazine' Gamazi*

<sup>11</sup> Neze zuho mate, lengiku' ge dovo ledeveno' o-nede ne dovo ledeveno' o-gede lamilo. Ve malib'mo gonolohi monovo ize' molo dovo ledeveno' ogo lihime molo-deline' nene ezevo' ne'mine o-damoloseive. Lou' gamazi nesi ne'mine o-do dovo ledeveno' ogo ivile' ogo ize' molaline' nene lou' gamazi gele daa' anive minamo lou' gamazilo' gizebo ogo ize' molaa' anive lolo' ogane. <sup>12</sup> Ido' O'moso'mo asi've hamo' lou' gamazi do soto' ogo ize' molaa' ive neive. Asi'vevo' do lu' izaakumu' ido' lele'mize tolovo ogakumu' laa' ive neive. Neine' nenako gasika O'moso noosa gonahi monovo ize' molo lihime molo-delibe.

*Igi Mili Ilizangumu' Okodine Di Dizamilo Lo Gazine' Gamazi*

<sup>13</sup> Lingine nene O'moso ivile' igi idise nehe aize' nehe ebe' mala vo kilisimasi hamo' mino bisinisi gono do moni heneni do soto' olone li laa' nani' aleve nene gamazi ma lo-lengemeloze. <sup>14</sup> Aize' inite' ne'minesi ne'minesi ogo molo ogo minelone laa' nani' nene lingine aize' soto' iline' inite' nene gili niisa laa' nahe. Lingine mo gilamave. O'mosovo' gele neive. Lengi' minivi' divi' igi nizani' nene olo' sokile ne'mino neive. Olo' sokile nodizivo nodizivo evene' gamene ngomo ningi nizavo gete geto osu' laa'

neive. <sup>15</sup> Nemu' nene ne'mine li lilo: Guvetesi ve'mo gelavo lamine' o neivo ma mine do dizo inite' ne'minesi ne'minesi ogo molo minelone li lilo. <sup>16</sup> Idise lingine monovo goloso di li-hime nidave. Hokolize' igi O'moso ivile' igi inite' ne'minesi ne'minesi ogo molo minelone li okodine di dizaa' nave. <sup>17</sup> Ido' inite' veveso lisihē' ogali'mi monovo ningi gili minisasi a'mine monovo lisihē' amilizani' nene lihime dalisave. Nemu' O'moso ivile' ami O'moso'mo gelo gele lemavo ma inite' ne'minesi ne'minesi ogo molo minelone li lilo.

## 5

### *Heneni Vemu' Gazine' Gamazi*

<sup>1</sup> Heneni nganeni ve lingine gililo. Mulumo nite' naba linginela soto' ilingumu' geke' geke' li ive nama igi minilo. <sup>2</sup> Henenitine di nubo nubo ani' nene mo hulupo elavo geneganatine lamine' nene gi'ningoni nete mo huki nikeve. <sup>3</sup> Ido' monitine nene gaba hitine' ne'mo moni di gili' li minani' monovotine nene do soto' ogavo ne'mo mulumo gono dikevo okodine ololi'mo lovoteine' geleleseive. Heneni di nubo nubo igi milani'za misubou' inite' osu' lilinē' gamene mo alitave. <sup>4</sup> Lengi' midingu' gono dave ingine gohise hili minamuno dolizi-lingidikevo lingine meni'ine lingela di haleki ngimamavo nemu' gono daa' ave ive nama ikevo inite' mukito' gizebo oga' ive amuzo'vesi minive O'moso aza gelave. <sup>5</sup> Lingine me misubou' mini noso' nitetine vai' ivo nivi' nivi' igi mini lanite' ato atoli'mine gili ize ne'mine gehesani'. Ne'mine igi gehesi

minikeni'za O'moso'mo lengebeleline' gamene nene mo noalitive. <sup>6</sup> Lingine nete evene' vevesi lisihel'i minani' goni' i-ngidi ngibilani'. Ido' lingine ningibilavo ingine di tibizi lingibilami haza hongu li minaa' nave.

*Gosele' Asele' Amo Gamene Nabamu' Gizebo Ogakumu' Gizine' Gamazi*

<sup>7</sup> Neze zuho mate, gosele' asele' ami Guvetesi ve alingumu' gizebo igi minilo. Lingine gili nizave. Mine zuho' iga' avete mine zuho' ani' nene gomu' golinesi alinge' golinesi izavo minamuno o molavo mine lamine' nalone li gosele' asele' ami gizebo igi minaa' nave. <sup>8</sup> A'mine'mine igi lingine gosele' asele' ami lutine mili ele'vole' igi minilo. Guvetesi ve aline' gamene nene mo alitelesa neize.

<sup>9</sup> Neze zuho mate, goni' o-ledelive mo avito' ogave. Goni' ikelizaze. Lingine ge nemenga laani ne gemenga loku lami lamini ha minilo. <sup>10</sup> Ido' O'moso'mi velemu' igi eze gamazi li soto' iga' ave polohete ingine evenelite goboni nimili-ngidavo nemu' nene gosele' asele' ami ele'vole' igi minani' nene gili nizave. Ingine mulumo initeku' mini gosele' asele' amo ele'vole' ogo minali'mi monovo nene lelebizikenaze. Ingine adi'mine ilo. <sup>11</sup> Gili nizahe. Ingine mulumo initeku' mini hongu li ele'vole' igi minave engikumu' nene O'moso'mo mulunou' lamine' gelo do lamine' o-ngedaa' neinako nemu' lamineku' minave ve lo laa' noune. Satani'mo goboni molo-davo Hizobe' aza mulumo alumo gilingukisi hongu lo ele'vole' ogo minine' ma gili nizave. Ido' alinge' Guvetesi

ve initel' mata' lamine' lehize-dine' nesi mo gili nizave. Nemu' nene Guvetesi ve'mo muhelete ningi muluno hukavo hize ele' o-ledaa' neive lo gelelone.

*Lamineto' Nolune Lo Okulumo' Misubou' Lo Molo Lamoloningumu' Gazine' Gamazi*

<sup>12</sup> Neze zuho mate, amuzo gamazi ma lolengemeloze. Gililo. Lingine gamazi ma lilizani' nene lamine' nolune li lilisa Okulumoto' li mili adine dizi li hukamilo. Ido' misubolo' ido' initel' malo' malo' li mili li hukamilo. O'mosola goni' ikelizaze. Lingine initel' mamu' oo. Mo lamineto' nolune lili ma nene laminetokovo' lilo. Ido' o've. Ne'mine amolone lili ma nene laminetokovo' lilo.

*O'mosola Laakumu' Gazine' Gamazi*

<sup>13</sup> Lengikuti' ve ma mulumo geni initeku' mino ma O'mosola liliive. Ido' mali'mo mulunou' lamine' goloso gelo mino ma O'moso opo'ni nolo nama liliive. <sup>14</sup> Ido' lengikuti' ve ma initel' gize do ongo mino ma mono' gizebo ve mamu' elese molavo igi heteli O'mosola li Guvelesi ve'mi velemu' igi uveli noso hili-dilisave. <sup>15</sup> O'mosomu' gili ele'vole' i mini O'mosola lilizani' nene Guvelesi ve'mo do lamine' o-davo initel' gize dave aza lamine' geleleseive. Lamine' gelavo lihime' ve ma mineline' nene O'moso'mo a'mine lihime' ve hulo-deleseive. <sup>16</sup> O'moso'mo do lamine' olengedelingumu' ve li lihime di mini' mini' ani' nene ingine li soto' avo lingine li soto' avo di bizi O'mosola li ge numuna lo-nede ne numuna logede laa' ilo. Ve lisihe' vevesi minavete O'mosola lilizani' nene amuzo malehe initel' neive. Ne'mo O'moso'mo gelavo initel' gihibevo' soto' oloseive.

<sup>17</sup> Elia' nene leli' gidini ve'mo asi've nene goline izamilive lo amuzo molo O'mosola lavo kilisimasi setohamosi ike'ni lumo sigisi vivo misubolo' go-line izamine'. <sup>18</sup> Alinge' nene gohi goline izelive lo O'mosola lavo Okulumokuti' goline izavo misubou' inite' mata' muki' nene gala ho'li dizani'!

<sup>19</sup> Neze zuho mate, lengikuti' mali'mo mono' gamazi gihile hulo aka zovo' izo gopo novivo ma mali'mo ele'mize tine' molaline' nene <sup>20</sup> aza gamazi ti' lo geleleseive: Ve mali'mo lihime'vesi ve ma aka golosolo' novidotil' do tine' molo-deline' nene a'mine lihime'vesi ve'mo emeni've nene mudise do u' izo lihime've muki' do hulodine' geleleseive. Modave.

**MONO' GODOLO GOSOHO'  
The New Testament in the Dano (Upper Asaro)  
language of Papua New Guinea  
Nupela Testamen long tokples Dano (Upper Asaro)  
long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 11 Nov 2022 from source files dated 9 Oct 2020

76c78bc1-63e6-5f61-a363-169051cf72e